



ル 5
3258
22

22



門 5
號 3258
卷 22

黃州府志卷之二十二上

黃州府知府英 啟纂輯

人物志

忠義上

元

蘄水縣

薛天定宋末盜起里人推為郡長募義勇保障寇不敢犯元世祖下江南手詔拜為防守尋擢先鋒使從平定閩廣累遷兩淮防禦都招討至治二年寇至淮力戰卒於軍上遣中使護喪贈總管諡威武錫廕孫徵事明太祖詳宦蹟王志入宦蹟今依通志移

黃州府志 卷之二十二 忠義上

昭和十八年
十月八日
購求

李清七與弟清八居黎山以義烈名至正十一年妖人徐壽輝陷蘄水人多脅從清七兄弟以爲恥避匿不出賊怒大索獲之兄弟歷陳大義堅抗不屈被殺有司嘉其義爲立廟於薛湖東之太公石歲時致祭焉

蘄州

李宗可有志略善禦余闕以兄女妻之用爲州判權義兵萬戶統新軍守水砦陳友諒陷安慶宗可橫槊入賊中擊殺甚多聞闕死馳還或勸之降怒曰元帥遇我厚死卽背之他日何以相見地下乃盡殺其家屬據牀縱飲至醉自刎

廣濟縣

張大九幼習左氏春秋元末見天下兵起遂隱陳友諒強致欲

官之不可友諒怒剉其足而去

周國鎮有武略徐壽輝踞蘄水遠近皆降國鎮於石龍坡之北合鄉民立周砦以忠義自矢血戰卻賊眾賴以全赴京畿請勤王順帝壯之授汝甯招討使

明

黃岡縣

廖永安字彥敬永忠兄也少倜儻自豪元末江淮兵起聚保鄉里聞太祖駐和州遣人納款太祖大悅元蠻子海牙集樓船寨馬場河安敗之於裕溪尋破鱗魚洲等寨太祖指揮諸將渡江安舉帆前向牛渚拔采石克太平蕪湖俘獲萬計海牙僅以身免張士誠寇瓜埠安乘夜擊之拔常州從常遇春進

黃州府志 卷之二十一
攻池州斬其帥復攻樅楊及江陰石牌海寇皆有功陞同知
樞密院事士誠寇常熟安與戰於福山港大敗之又率舟師
擊士誠太湖乘勝深入水淺舟膠爲呂珍所獲降之不可尋
卒於姑蘇年四十七喪歸太祖郊迎親爲文祭之賜葬鍾山
之陽配享太廟諡武閔封鄖國公以從子昇爲淮安衛指揮

僉事

依縣志增入

曾全正統間征橫江戰死予襲指揮子恕詳篤行

方勇字松軒諸生性英敏博學善屬文正德閒流賊數犯黃州
城門不啓有官軍臨城郡守疑爲賊將然礮擊之勇曰未可
若非賊非抗官軍乎察之果官軍也未幾賊大至圍城急勇
率鄉勇千人激以忠義誓共官軍滅賊大破之黃州解嚴勇

謀略素優凡大疑大計守令皆取決焉卒祀鄉賢子任詳宦
蹟

吳璋倜儻負氣爲邑掾吏嘉靖時議大禮諸臣忤旨譴謫纍纍
璋曰死忠孝者分也我其爲陳東歐陽澈乎徒步詣闕上書
救楊廷和等復力持前議詞甚激切帝怒下錦衣獄杖之越
數日太廟災帝問湖廣前日上疏小吏何在守者疑不能容
壓死以報帝曰惜哉朕將有以用之也

奚世亮字明仲父樸舉人富陽知縣有清操卒祀鄉賢世亮嘉
靖丁未進士授南戶部主事權稅以廉著轉刑部郎中出知
思南府左遷高郵州同知先是世亮餉楊繼盛於西市嚴嵩
銜之至是削秩四十一年倭犯閩浙乃起廢以爲福建延平

府同知時興化缺守倭寇且亟凡委署興象者咸計避以屬世亮世亮曰承平受爵臨變而避非忠也遂捧檄往倭圍興化率士卒登城親冒矢石踰月總兵劉顯遣卒八人齎書城中衣刺天兵二字賊殺之而衣其衣給守者得入夜斬關延賊副使翁時器參將畢高皆縋城走世亮獨格鬪身被數創死賊平乃得遺骸於旗亭事聞贈福建右參議賜祭葬祀鄉賢廕從子繼善授詹事府錄事妻王氏以節旌明史附忠義黃釗傳

康良臣嘉靖閒以掾為定海尉率義兵與倭戰斬首三十餘級身被重創猶手戈馬上以死事聞廕一子入監

樊玉衡字以齊煒子萬歷癸未進士授廣信推官晉御史時儲位未定光宗為皇長子年九齡未視學朝臣未敢言衡抗疏

請正元良之位越三年忽傳三王並封之旨衡復疏諫語益激亡何謫判無為州稍遷全椒知縣二十六年四月玉衡以冊立久稽上言陛下愛貴妃當圖所以善處之今天下無不以冊立之稽歸過貴妃者而陛下又故依違以成其過陛下將何以託貴妃於天下哉由元子而觀則不慈由貴妃而觀則不智無一可者願早定大計冊立冠婚諸典次第舉行使天下以元子之安為貴妃功豈不並受其福享令名無窮哉疏奏帝及貴妃怒甚旨一日三四擬禍且不測大學士趙志皋等力救言自帝即位未嘗殺諫臣帝乃焚其疏忍而不發再踰月以憂危竑議連及遂承戍雷州全椒人哭送之名其草疏處為翼日堂居雷州二十四年長子鼎遇伏闕請代者

再不許光宗登極季子維城時官海鹽知縣覃恩當封請停封道父罪於是起南京刑部主事以老辭疏陳親賢遠姦十事優詔答之尋命以太常少卿致仕卒於家祀鄉賢子鼎遇詳孝友維甫詳隱逸維城自有傳詳明史列傳

孫大祚萬曆乙酉舉人累官淮安府同知有惠政遷易州知州時稅監王虎以開礦駐橫嶺肆為民害大祚力與之抗不少屈虎嗾甚尋虎以橫恣激廣昌民變乃誣劾大祚阻撓礦稅坐貶後礦稅罷以楚雄推官起用未任卒贈按察司僉事旌其忠節事詳明史祀鄉賢

韋宗孝字養玉母常臥病咳血孝必以手承之母卒刻木像朝夕奉祀卽道途飲食必先獻然後敢嘗萬曆閒授嵩明州吏

目值武定賊鳳騰霄反犯嵩明出禦而敗被執不屈闔家殉難僅遺一子蜀麟老僕韋全自棄其子而匿之缺瓮中得免事聞賜祭葬贈本州同知蜀麟廕入監明史附忠義蘇夢暘傳

王追皋字直之廷贍長孫萬曆時三中副榜以任子官郎署轉貴州安順知府時安邦彥作亂安順道絕皋傾家貲募壯士以行巡撫王三善聞而壯之且素知其材略可用因委署平壩兵備副使督兵討安酋十七戰皆捷以勞病三善欲以三千騎護歸皋曰不忍負國並不忍負知己遂卒於軍子一翥陳其狀贈太僕卿廕一子入監一翥詳隱逸

易道暹字曦侯諸生好學尙氣節居深山中積書滿家與艾南英為文字交甚篤崇禎八年流賊至道暹惜所積書又以己

所著書多不忍棄遂巡未及行賊逼近長子為瑚奉母走青峰巖道暹攜幼子為璉擔書以行遇賊給曰余書買也賊笑曰汝易曦侯何給我道暹曰若既知我當聽我一言慎勿殺人焚廬舍賊曰若身不保尚為他人言耶道暹厲聲叱賊賊怒殺之為璉請代賊並殺之未幾為瑚亦被殺道暹為璉俱祀鄉賢乾隆四十一年

予祀忠義祠

為瑚詳孝友

明史附忠義馮雲路傳

馮承遇承選崇禎八年遇賊被執賊偉其貌脅之去大罵不從賊怒俱殺之同時以罵賊死者有蕭繼昇吳衍周吳應周諸人承遇子雲路自有傳

王一桂字千秋萬曆己酉舉人崇禎九年以戶部主事督餉昌

平

大清兵入喜峰口圍昌平一桂分門協守以南城最要身往扼之俄西城陷一桂被執死妻姚氏妾邱氏陳氏及子女家眾凡二十七人投井死僅遺十歲兒與一婢潛土穴中得免事聞贈太僕少卿賜祭葬廕子乾隆四十一年

賜諡忠烈

明史附忠義王肇坤傳參通志

周之訓字日臺一字無逸啓孫子立身方嚴好學洽聞萬曆癸丑進士授戶部主事權准關約己通商旋督學八閩校閱皆出一手累遷浙江按察使坐事罷起山東參議備兵萊海以繕城功增級資金移濟南分巡副使崇禎十一年冬十二月大清兵自畿輔南下是時巡撫顏繼祖移鎮德州濟南空虛止鄉

兵五百萊州援兵七百勢弱不能支而督師中官大將皆擁重兵觀望不救之訓與右布政使張秉文等分門守晦日糧盡兵民思潰諸官集計事之訓按劍曰今日之事與諸公守此土死北面拜哭遂乘城二日城破秉文戰死之訓死於南城上闔門皆死之弟之記伏闕疏陳贈光祿卿諡忠烈賜祭葬建專祠並祀鄉賢廣濟劉醕驥為之傳乾隆四十一年

賜諡節愍

明史附忠義張秉文傳參通志

方應星字文卿崇禎丙子武舉巡撫宋一鶴擢為都司投兵三百防守遠安闖賊據襄陽招之不從遣賊將合數萬騎攻城三日不能下叛卒開門應之應星被執不跪誘以偽職大罵死之

王志注按通志載武昌武舉查舊志科甲內係黃岡縣人今收入

周啓元字善長父有為甯國知縣啓元年十二侍父病晝夜不輟父卒哭幾絕歸次蕪湖舟覆啓元抱櫬浮水出乃歸葬天啓丁卯舉於鄉官高苑知縣兼攝樂安臨胸崇禎十五年大清兵東下破高苑啓元朝衣握三縣印坐堂上不屈死事聞贈按察司僉事廕子入監乾隆四十一年

賜諡節愍

明史附忠義邢國璽傳參通志

程之奇通志崇禎歲貢生官荊門州訓導十五年十二月闖賊寇州之奇與學正張效方盟諸生於明倫堂佐知州盧學古守城賊環攻四日援絕城陷不屈死乾隆四十一年

予祀忠義祠

明史附忠義盧學古傳

王家錄字愧修天啓辛酉舉人官刑部郎有請恤刑熱審諸疏

改戶部員外郎督餉榆林李自成方據西安遣將陷延安綏德將及榆林時家錄擢關南兵備僉事未行曰撫軍方罷總兵官已遁吾不可去當守此土崇禎十六年十一月賊攻榆林家錄助兵備副使都任督軍民固守二十餘日賊礮如雨城無完堞家錄令軍士乘城婦女運水灌其堞冰結數寸賊不能上乃謀穴地入家錄以火藥灌燒之賊死無算勢稍卻旋合甯夏諸賊來攻援絕城陷都任死之家錄引佩刀自刎遇救甦齶頸血書忠義二字復自縊死屍六日不僵賊見之皆下拜事聞贈光祿少卿賜祭葬廕子乾隆四十一年

賜諡節愍

明史附忠義都任傳參通志

奚鼎鉉字仲雪崇禎己卯舉人下江防道許文岐守蘄州引與

俱十六年獻賊陷蘄與文岐同被執文岐密謂鉉曰賊老營多烏合餘皆被掠良民若告以大義同心協力賊可殲也於是陰相結期四月起事以柳圈為信謀洩同被害乾隆四十四年

予祀忠義祠

勝朝殉節諸臣錄

案明史云文岐見殺鼎鉉以計遜與此小異

樊維城字紫蓋一字允宗玉衡季子萬曆己未進士除海鹽知縣以清能稱遷禮部主事天啓七年坐事謫上林苑典簿莊烈帝即位抗疏請誅魏忠賢且言高皇帝定律人臣非有大功朦朧奏請封爵者所司及受封之人俱斬今魏良卿良棟鵬翼白丁乳臭兒並叨封爵皆當按律誅忠賢所積財半盜

內帑籍還太府可裕九邊數歲之餉因請褒恤楊漣萬燦等十四人召還賀逢聖文震孟孫必顯等三十二人亟正張體乾許顯純楊寰等罪其月又言崔呈秀雖死宜剖棺戮屍五虎五彪之徒乃或賜馳驛或僅令還鄉何以服人心昭國典末斥吏科陳爾翼請緝東林遺孽之非乞釋御史方震孺罪帝並採納之崇禎元年遷戶部主事進員外郎歷泉州知府福建副使八年罷歸十六年春獻賊圍黃州維城率眾拒之三月二十四日城陷抗聲罵賊受刃洞胸死從子諸生齊華殉之乾隆四十一年

賜諡烈愍

明史附樊玉衡傳參通志

郭以重世為黃州衛指揮崇禎十六年間獻賊陷城自他所來

赴難妻李氏止之以重曰朝廷畀我十三葉金紫不能易一死耶吾將先殺汝矣行遇賊脅之去不從賊露刃逼之乃好謂賊曰從汝誠易但抱小兒者吾妻也汝為我殺之吾無累矣賊如其言以重即奪賊刀殺一賊羣賊繼至遂赴水死乾隆四十一年

賜諡烈愍

詳明史忠義傳參通志

曹士謨字獻虞十歲就童子試府縣皆首拔督學鄒愚谷訝之曰異才也仍以冠軍既長學益富知縣茅瑞徵延與呂元音同修邑志天啓初歲貢除隨州學正教士有法尋告歸值獻賊寇黃州與樊維城倡義固守城陷死之乾隆四十一年

子祀忠義祠

李士奇世襲黃州衛指揮陞鄖襄行都司尋致仕歸崇禎十六年獻賊破黃州率家眾挾弓矢奮身禦之矢盡被執罵賊死
王子堅通志作子見武舉明季寇警與力士徐季貞通志姓余學正曹士謨守城衝鋒破敵殺賊無算城陷猶奮力巷戰賊眾叢矛刺之被執齊聲罵賊賊怒且妒其勇皆磔之乾隆四十一年俱

予祀忠義祠

勝朝殉節諸臣錄

馬士英字子才幼尚氣節崇禎閒流賊肆掠英團練鄉勇阻潭水立寨保聚十餘年巡撫宋一鶴親臨獎慰題加游擊銜崇禎十六年三月獻賊犯境時斬弁夏大武黃推官許士奇降賊素與士英契招引再三士英峻拒之曰吾終不負宋公與賊戰力盡死親丁殉者五十一人總鎮毛顯文躬弔祭焉

吳思温字揚休萬曆甲午舉人

通志作江夏人萬曆乙卯舉人

官廣西布政使

告歸寓武昌崇禎十六年獻賊薄城率兵守保安門抗節而死葦席裹屍數月不變妾田氏子江英諸生子婦游氏及兩女俱投井死

馮雲路字漸卿諸生年三十棄舉子業從賀逢聖講學遂寓居武昌著書數百卷巡按御史林鳴球疏薦其賢並上所著書不用崇禎十六年獻賊將渡江雲路貽書逢聖曰在內以甯湖爲止水在外以漢江爲汨羅甯湖雲路講經處也城陷乘桴入甯湖賊至持令招安同里有朱生者勸暫屈勿死雲路答曰我生平惟讀忠孝書未讀降賊書也遂懷所著藏易投湖死子永明諸生痛父之死哀毀幾絕終身不入城市乾隆

四十一年

子祀忠義祠

詳明史忠義傳
參通志

案雲路初隱居江南九峯山中杜門絕與縛草為亭題曰待與亭巡撫宋一鶴兵備道張秉貞許文岐三顧請教不得見御史林銘球造其廬請曰君儻稅駕棘闈若輩得以榜頭副皇上求賢之典雖私亦公也雲路謝曰是何言哉路敢以一人之伸作國家亦公之備乎制科取士堂曰至公未聞亦公也林益歎服朱日濬馮微君傳
熊需字渭公諸生與馮雲路同寓武昌喜邵子皇極書頗言未來事崇禎十六年元日盡以所著書付弟雲霽以歸曰善藏之城破前一日貽書雲路言明日當覓我某樹下及期行樹

旁賊追至躍入荷池以死者有性理格言春秋主左十三經注疏評略大易參立齋古今文及圖書懸象諸書乾隆四十四年

子祀忠義祠

明史附忠義
馮雲路傳

汪陞延一名三奇字亦常諸生貌古心樸從馮雲路遊嘗著五經成崇禎十六年寓武昌獻賊至與雲路分門守禦城陷陞延呼曰我黃岡汪陞延殺賊者我也賊執之以刃脅降不屈謂其子邵孫曰我生平力學在今日汝有母勿死也賊投之湖湖水及肩陞延坐而死賊去始斂貌如生乾隆四十一年

子祀忠義祠

明史附忠義
馮雲路傳

操志述字振翼獻賊攻武昌城內糧盡述數見禮於楚王亟請

發帑以犒守卒不聽城破赴難長子日元請從許之次子暄亦往止之曰宗祀不可絕遂同日元赴水死

史子見諸生尚氣節里有毛主席伯為獻賊偽總兵至辛家衝搜括富室招納亡命子見憤甚殺主伯獻賊怒下令三日不獲子見屠其鄉子見挺身往賊磔之皮肉都盡骨猶屹立不仆乃鎖其頸於彰孝坊夜分鎖脫骨走臨湖寺次日賊大索獲之復刃其首至今鄉人以為神立廟祀之乾隆四十一年

子祀忠義祠參通志

戴瑾字可懷諸生膂力絕人明末聚義勇守馬鞍山獻賊至瑾伏狹路邀之殺賊千餘人射獻賊中肩賊訝其勇欲生致之圍數重瑾登樓飛瓦擲賊賊不得上乃積薪焚之瑾及子孫

并義勇三百七十人俱燼乾隆四十一年

子祀忠義祠一統志

王躬靖諸生弱冠尚氣節善射流賊之亂保障山砦每戰輒勝賊聞其名招之不從後困於迴龍山罵賊不屈死

於斯行字爾翼倫子崇禎癸酉舉人流賊破團風鎮被執不屈死同時曹大震字子且諸生孝子大聲弟也亦以罵賊死乾隆四十一年俱

子祀忠義祠

樊維章字闇生諸生英果有智略明季羣盜起率子弟練鄉勇立砦桃花洞賊不敢犯及獻賊陷黃守愈力賊晝夜攻破之章被執勸降不屈死弟諸生維默維清亦罵賊死清死時血

高丈餘濺賊面默首在地猶僵行手斃人乃仆闔門死者百餘人

鄧雲程字扶風諸生父士駿以孝友稱雲程性倜儻流寇逼黃守令召雲程計事曰生聚教訓此時已無及惟有不肯一軀可當餓虎之蹊耳持一鐵鞭重四十斤長五尺許縋城而下獨當賊衝三晝夜賊不至乃還闔賊陷京城北望號泣嘔血數升忽忽狂走卒於河南商城子之愈以觀歸同里杜濬爲撰鄧子哀辭

案杜濬哀辭云卒於洛南之橫谿侯攷

朱寵黃州衛千戶崇禎十六年奉憲司王瓚檄赴上游禦流寇三月獻賊破黃州五月武昌陷寵隨憲司兵東下聯義兵復黃州城次年聞國變仰藥死

但銑由歲貢選授某邑訓導值流寇亂未赴會聞都城失守思陵殉社稷奮然曰銑校官也所以訓導諸生者何事豈以未食其祿而不同其難耶遂絕吭死

方堯相字紹虞崇禎歲貢生官成都同知十七年獻賊寇成都堯相從巡撫龍文光守城監紀軍事兵食絕請濟於蜀王不應泣投於池以救免城陷被執不屈遂殺於萬里橋下其絕命詞云時危節見古今同取義成仁且盡忠江水茫茫願借力此身飄蕩赴團風乾隆四十一年

賜諡節愍

明史附忠義張繼孟傳參通志

蔡馨明字克薦天啟丁卯舉人官眉州知州流寇至守禦力竭題詩大雅堂云澄清板蕩是男兒大廈難將一木支父子酬

恩思主德全家殉難想天知芙蓉城陷誰階禍大雅堂空獨
臥屍萬里黃岡魂莫往好為明聖護峨眉遂闔門殉難乾隆
四十一年

子祀忠義祠見湖北詩錄

余士璋字季美制行端方尺寸不苟崇禎丁丑進士任九江府
推官左良玉兵叛士璋仗義入其營罵賊賊斷其左臂父老
泣扶之出越十日卒於廬山乾隆四十一年

賜諡節愍見一統志九江府志

於斯昌字文言崇禎己卯舉人獻賊寇黃聞其名索之敝衣草
笠走免後以督師萬元吉薦授兵部主事唐王時佐元吉守
贛州城破被執不屈死乾隆四十一年

賜諡烈愍勝朝殉節諸臣錄參通志

蘄水縣

王聰性謹畏有膂力建文時以燕山中護衛百戶從靖難兵取
薊州攻遵化徇涿州轉戰荏平滑口破南軍獲馬千五百次
江上略南軍舟濟師累功封武城侯後從邱福北征本雅失
里戰死贈漳國公諡武毅祀鄉賢明史附邱福傳
呂鏞宣德丙午舉人任宣陽知縣有政績調清流縣流寇鄧茂
七至清流邑無城郭鏞拒之力不能支具服端坐庭中抗聲
罵賊遂被支解清流人立廟祀之並祀鄉賢一統志
鄧祖禹字文元萬曆己未武進士授遊擊屢立戰功征辰沅苗
擒賊酋飛天王張五保斬首千五百級夷其巢陞副總兵崇

頑閒流賊入楚移鎮德安數與賊遇多斬馘功復移孝感會
應城急檄祖禹往援孝感士人泣留曰兵一動城不保矣祖
禹不得已留兵一半守孝感率七百人入應城賊突至圍之
數重血戰自辰至酉為賊所執欲降之禹曰須換卻心肝乃
可賊怒剜肉剖心而死賊退子天源天河覓屍歸應城人祀
之並祀鄉賢乾隆四十一年

賜諡忠烈

明史附忠義張紹登傳
參通志

李師淵崇禎戊辰武進士累任陝西固原遊擊七年夏賊來犯
擊卻之閏八月朔賊陷龍德師淵隨參政陸夢龍禦之賊麕
至突圍不得出師淵夢龍大呼奮擊俱戰死

程為常徐玉蘭蔡巨人胡方壺徐用極俱武舉崇禎十年春流

寇至邑令募壯丁五百八十人守城以五人主五營三月與
賊力戰死邑令立五義祠祀之乾隆四十一年俱

予祀忠義祠

程正秩字維明力勇善射萬厯癸卯戊午兩科武舉授邑營官
督本府團練崇禎十六年三月流寇逼城力戰死

程九萬字翼雲天啓恩貢生任興安州知州崇禎十三年以事

謫池州府知事尋署東流知縣順治二年四月左良玉叛將

楊么兒破東流九萬死之妻汪氏弟九鼎九觀殉焉

江南通志

義僕附

王九兒州判王悅民僕負擔隨主與流賊遇賊探其擔得金問
主人何在不言加之刃無懼色乘閒肘悅民使去賊先劓其

目次斷其手每一揮刀問主何在終不肯言

王子兒諸生王三慎僕各被賊刺數槍兩無生理三慎欲自投水中子兒力止之裹創負三慎從亂尸堆中走七十里竟抵家親串聚觀皆泣下

安子官氏家僮負盾守城被執不屈死後得尸見臂間鐫有大憾流賊四字

添賜廩生李添植僕寇執添植賜願以身代遂被殺麻城縣

張勝天順六年任零都尉長河峒賊竊發勝率民陳世用等禦之賊圍急援兵不至死於陣江西通志

熊嗣先字懷慎修儀博學萬曆丁酉舉人授南充知縣循聲卓

著陞敘州同知以督兵死奢賊之難贈秩廕一子黃州衛百

戶後祀南充名宦祠一統志

周應泰字子登宏禴子任甯羌州知州崇禎十年流寇圍甯羌應泰堅守數月城陷被執不屈與次子諸生棗同遇害乾隆

四十一年

賜諡節愍陝西通志

彭有謨初名謨少貧困從戎累立戰功崇禎四年以援登萊功授副總兵賜名有謨登萊人生祀之後里居率眾禦流寇眾寡不敵力戰死

魯元孫諸生獻賊擾楚與兄諸生振公弟諸生聖叔糾眾守雲霧山岩糧盡垂破元孫以兄大宗義不可死促之逃須臾岩

破被執賊愛其材欲生降之元孫大罵曰吾家世忠義豈從鼠賊耶賊擁至陶家鋪復罵曰欲殺便殺何相逼為遂與家人數十俱被害

周之茂字松如崇禎甲戌進士歷官工部郎中以服闋需次都下闖賊陷城搜得之迫使跪不屈折其臂而死乾隆四十一年

賜諡烈愍 明史附金鉉傳 參通志

周世岐字文生任北直隸甯衛守備賊至戰死遂葬甯衛蔡家塘

黃安縣

阮貴卿性英烈明太祖起兵時從行閒屢立戰功及與陳友諒

戰鄱陽貴卿奮臂衝鋒被賊礮碎其首死太祖詔鑄銅頭葬之

彭應選字克符萬厯癸卯副榜旋膺選拔任靜甯知州闖賊擁眾十餘萬圍城應選登陴擊柝親冒矢石十閱月糧匱外援不至賊射書入城云獻彭某圍立解否則城必屠應選告士民曰余死守孤城凡以為百姓耳與其城破而玉碎曷若吏死而城存耶眾皆哭願死守應選姑應之凌晨朝服北面再拜畢獨縋城直入賊陣大呼曰我靜甯知州也速殺我救一城之命賊壯而釋之竟解圍去

胡伯少有大志好騎射天啓甲子武舉後賊氛漸逼伯度形勢設木柵以守險賊才之招以書不往崇禎八年秋賊眾突至

環攻必欲得伯而後已伯慨然曰豈以吾一人故累眾人耶苟吾死而圍解死亦何恨語賊曰我即出可解此圍賊許之遂單騎赴賊營圍解卒自勿死

吳士旨性友愛事孀嫂撫諸孤姪悉盡道歲歉出粟賑饑鄉里多所全活明末寇亂率勇堵禦與妻秦氏俱以罵賊死

吳光寅字念陬諸生高才磊落為提學董其昌葛寅亮所賞時行保舉法以何閔中薦授范縣知縣多善政踰年被劾罷方候代賊至光寅督戰罵賊死閔中子昌祚為文哭之

吳國字字祁陽諸生博學敦實行崇禎時闖賊橫掠國字同子諸生士愷團練鄉勇有捍禦功後率老幼保風水山砦因汲道絕內潰國字士愷以罵賊死孫諸生之龍之璋之瑋皆被

殺妻韓氏妾沈氏亦死里人思國字功祠祀之私謚士愷曰孝勇國字並祀鄉賢

秦自輝字景行慷慨有大節崇禎十五年賊襲黃安輝奉知縣李元玉設壇誓眾力捍疆圉築三角山砦十六年省城陷賊將擁兵逼砦砦潰被執抗罵不屈死

盧希儲號蓮峰崇禎癸酉舉人奉其父諸生昌逃難山砦流寇掠而執之曰出金即活汝儲罵曰恨不殺汝以報朝廷豈反向賊求活耶遂遇害父昌罵賊益厲亦死兄希聖弟希同相繼罵賊死

熊夢祥事父以孝聞賊掠縣境夢祥倡義堵禦賊銜之蜂擁至三角山按姓索夢祥急夢祥與妻張氏訣曰吾當為國死汝

盍行乎氏以死自誓俱為賊執賊惜夢祥勇略欲生之夢祥罵不絕口身被百創死張氏益奮罵賊縛氏足而馳道經古堰氏奮躍入水馬逸不得墮賊拔刀斷其雙足推溺之堰水盡赤

王祚昌字竿南諸生明末賊氛四起各立山砦以自固眾推昌為砦長力捍強寇會圍久糧絕不能守昌啓砦突圍率眾當先血戰死

王國甯字萬成崇禎己卯副榜試北雍第一授彭縣知縣賊至國甯冒矢石登陴固守久之兵盡糧絕城陷死之

盧爾惇字以崇堯臣子少負才名崇禎末舉賢良方正授巴州知州獻賊入川至城下爾惇發礮中獻忠幾斃賊復合眾來

攻城陷巷戰身中百創死祀鄉賢子繩慈詳宦蹟純慈詳孝友

程之渡字葦如諸生父繼善官安慶時楚帥左良玉子夢庚叛沿江下之渡聞之亟往省父而父已掛冠月餘貧不能歸遂留皖未數日夢庚兵誼江上執之渡曰汝父為朝廷鎮帥不能出力報效乃自相殘殺乎罵不絕口遂被害

羅田縣 劉廣洪武中以軍功為指揮僉事守永平有膽略善用雙刀邊騎突入廣率四十餘騎遇於城北力戰死之事聞遣使護喪至金陵賜楮幣葬紫金山祀鄉賢

張正福勇敢善戰正德六年流寇趙瘋子掠黃州正福與弟正

顯姪友舜友珠應知府胡定募攻賊壘馘賊首八卒以深入受困正福死於陣弟姪俱戰死胡定撰文祭之

崔爾達崇禎時任陝西西安指揮適闖賊寇西安達登陴拒戰

參將王根子內應城陷全家遇害

載明紀輯略

胡效素諸生崇禎十二年流賊竄縣境江家埠知縣白乃忠命

效素率勇禦之失利被執賊知乃忠有貂君花馬擁效素至

城下遙語守陴兵與我馬即釋效素大罵曰死便死耳馬不

可得也賊殺之

余彌綸崇禎己卯舉人授浙江仁和教諭告歸流賊寇羅田綸

櫻城守禦城陷死之時光祿寺丞蕭斯和亦以城破不屈死

周文華膽略過人流寇千餘竄白馬坳華率眾拒之手長刀殺

賊十八人自辰至午不少卻卒以眾寡不敵被執不屈死

王邦衡字養默廩生崇禎十六年為流寇所執子鯉字翰伯亦

廩生聞父被執奔賊所願代父受戮賊並執之均以罵賊死

乾隆四十一年

予祀忠義祠

勝朝殉節諸臣錄參通志

葉欽明弟暹明俱諸生其父常學率眾築堡於大羅山賊屢攻

不克適欽明暹明運糧入堡賊偵知於中途攔截執之俱抗

節不屈遂禁錮其地土臺中越日以火焚死

郭良甲諸生性孝友同鄉人立砦高鵬山賊圍之鄉人知力不

敵涕泣待死甲曰勿怖吾能掉三寸舌走之遂單騎入賊壘

賊酋曰汝來何為甲曰乞數千人性命耳酋曰以糧畜來宥

汝甲曰若中人掘草根剝樹皮食已數日矣安有此酋曰汝
不怕死耶甲曰某怕死某不來矣言訖引頸受刃賊義之竟
解圍去子聯第歲貢生事繼母以孝稱

王燭字安定天啟丁卯舉人累官河南監軍道告歸崇禎八年
流賊陷羅田知縣白乃忠至倡議築城燭助之城成保全甚
眾甲申之變盡室南遷道遇賊率家丁與戰不勝死之妻汪
氏殉焉

方應尊字省叔廩生沈毅嗜學嘗構讀書臺於宅旁崇禎十七
年賊陷京師尊聞變踉蹌登臺望燕雲痛哭閉門面北危坐
不食而卒妻胡氏殉焉

陳守芬儒士平居教子弟以節義每云儒者讀聖賢書當識忠

孝事一旦臨大節毋苟且偷生以貽後世譏隱居不仕時與
杜茶村相往來後聞闖賊陷京城絕粒不食卒

蘄州

操桂字丹精洪武四年從柳良正軍攻取所向有功授忠信校
尉十六年赴遼陽值偵達侵境桂領本衛騎兵迎敵乘勝深
入會敵救至轉戰陣亡義犬銜其首蹴沙瘞之歸嚙健兒衣
若有所欲往從至瘞所出之面如生函歸飾衣冠以葬事聞
命御史趙傑致祭贈宣武將軍廕其家襲衛職崇禎十七年
裔孫承勳殉難都下

陳相中所百戶趨捷敢戰正德九年由廣西調雷州從官軍守
陽春鳳凰砦時陽春山賊猖獗乘夜來攻相督兵拒之兵潰

挺身力戰殺數賊卒被害

廣東志

田金浦字麗水萬曆十六年黃梅劉少溪倡亂金浦聚義勇捍衛鄉閭知州徐希明上其功使防禦本境會賊聲言攻城金浦與州判陳策選勁騎迎擊斬首數十賊奔潰金浦暫憩叢竹閒賊忽大至奮臂殺賊力竭而死事聞贈總兵子宗演冒刃負屍歸鄉人建烈士廟祀焉

陳顯元字長卿崇禎時以副榜授新安知縣惡衣糲食徒步問民間疾苦以城堞傾頽不利禦寇率士民入保闕門砦賊檄降立碎其檄及來犯死守月餘力竭而陷見賊怒罵賊恣殺砦中人顯元叱曰守砦者我也百姓何辜甯殺我賊怒支解死無子其甥浦某以櫬歸葬事聞贈僉事新安人立廟祀之

乾隆四十一年

賜諡忠烈

明史附忠義劉禮傳參通志

張效方字正甫崇禎歲貢生官荆門州學正闖賊寇州效方盟諸生於明倫堂助城守城陷死之乾隆四十一年

予祀忠義祠

明史附忠義盧學古傳名作效芳

李新宇卽巖萬曆戊午舉人官潛山知縣歷戶部主事權臨清關舊有舟車二稅奏免車稅以便商遷陝西僉事以親老乞養歸崇禎十六年獻賊屠蘄闔家被執新父諸生于節爭先罵賊引頸受刃賊脇新跪新罵曰我昔官秦中爾輩方爲廝養今日肯屈膝廝養耶賊怒新抱父屍罵不絕口賊鬻割之其母楊氏及弟綺子承裘承弓同殉焉新祀鄉賢乾隆四十

一年

賜諡忠烈

明史附忠義許文岐傳
參通志

張邦翼字君弼萬曆戊戌進士由臨海知縣遷南戶部主事督學廣東最得士刻有嶺南文獻錄行海內移浙江驛傳道請免里解以蘇民困監軍四川平安世咱諸蠻歷江西右布政以老乞歸獻賊陷城不屈死之祀鄉賢乾隆四十一年

賜諡節愍子效葵詳宦蹟

參通志

李樹初字客天時珍孫萬曆己未進士任戶部主事晉郎中督宣大餉時太監王坤節制宣大巡按道進見猥由角門入樹初稱疾不往將中傷之適璫敗得免後以山西副使致政家居會流寇猖獗罄家貲築礮石符乾二險斬人賴之崇禎十

六年獻賊陷城被執不屈死長子延慶貢生孫之蘋之藻廩生同遇害次子具慶陳狀允祀鄉賢乾隆四十一年

賜諡節愍具慶詳隱逸

參通志

案樹初致仕後居舟湖上自課詩文有穎餘慵緒數十卷及城破與家人訣曰我雖在籍自當盡節爾輩讀聖賢書死生有命亦不可屈於賊也故一門爭從死焉

州志

李挺字長甫際春子天啓壬戌進士初任博野知縣申堡制嚴保甲調真定時魏瑞莊佃為民害徑繩以法累官兵部郎備兵遵化值歲荒民無宿儲僵仆滿道官兵或竊殺以冒功挺嚴妄殺之罪給錢煮粥並給印票護之活難民五千餘人崇禎十六年春獻賊至蕪時挺致仕家居條守禦二十四事眾

議未決城遂破被執不屈死事聞賜祭葬祀鄉賢子本裕本仁俱以學行知名本晟詳宦蹟本甲詳孝友乾隆四十一年

賜諡節愍

參通志

饒京字黃山天啓壬戌進士巡按蘇松諸郡再巡淮揚甚著風裁大姦蟠固不可動者悉按誅之遠近肅然崇禎十六年獻賊陷城殉難祀鄉賢乾隆四十一年

賜諡節愍

參通志

岳璧字連城蘄州衛指揮獻賊破蘄璧自屋墮地不死賊擁至城上脅之降璧怒曰我世臣也城亡與亡豈汝降哉賊怒刺之仆地氣將絕瞑目視賊曰我爲鬼亦能殺汝時大雪血流赤丈餘目皆不合後祀鄉賢乾隆四十一年

賜諡烈愍

明史附忠義郭以重傳參通志

董一化字南鯤以歲貢除仁化知縣鄰民有冤當事不能決立爲剖釋改知印江縣其地近苗捐俸脩城以備不虞致仕歸獻賊陷城不屈死祀鄉賢乾隆四十一年

賜諡節愍

參通志

盧如鼎字呂侯廩生潛心好學性篤孝友崇禎十六年賊至鼎率義勇守南城城陷遇害子姪從死者九人鼎祀鄉賢乾隆四十一年

予祀忠義祠子絳詳儒林

參通志

李化龍字如雲孫仍字雲孫俱諸生崇禎十六年獻賊破蘄以不屈同死督學部列狀以請詔入祀鄉賢祠乾隆四十一年

俱

子祀忠義祠

蕭霽字東曙年七齡州府道試皆第一次年歲試亦第一食廩
餼時稱神童崇禎十六年獻賊破斬時年二十四賊見其穎
秀欲留以爲佐霽曰我家世受國恩豈仕汝耶賊怒斃割之
霽才與顧景星齊名惜著作散佚

陳正字剛中諸生幼穎異爲文雄奇英邁巡按宋某觀風拔其
卷冠九屬與同郡張子都齊名獻賊陷城欲降之正罵不絕
口觸石死

顧天祚字悠也諸生性耿介篤氣誼教授里塾每出館穀以周
飢寒流寇陷斬天祚不屈觸石死著有後松園人物博觀等

集子咸泰詳宦蹟

張效鍾字期伯以廩貢入太學有聲獻賊陷斬執鍾使跪鍾曰
吾家世忠良豈從賊耶罵不絕口賊梃殺之子諸生承馮同
死諸生黃正中字君位亦以城破不屈死

胡其志字存雅監生夙負氣節遇事伉直敢言崇禎十六年遇
賊於蘇家山全家被劫其志曰釋我妻子奉母歸吾願荷戈
賊許之行至五里墩默計母可免乃大罵賊賊殺之妻張氏
以節終

貢其志天啓甲子舉人官屏山知縣廉明有政聲解組歸里寓
省城崇禎十六年獻賊圍城城陷闔門自焚死乾隆四十一年

黃州府志卷之二十二
賜諡節愍入祀省垣鄉賢祠

陳其効字無功爲州諸生有聲明季賊至避亂於牌石地方慷慨悲歌坐水中而死

廣濟縣

胡海字伯川宣德中以貢任安南夏華知縣黎利反死之

向雲字從龍善騎射以武舉任興國營千總治軍有法正德初江西羣盜起無敢逼興國者六年春南贛巡撫周南分兵三路進勦雲前驅破賊巢斬馘無算尋中流矢卒於軍長子國祥赴難死

程紹川萬厯初劉少溪作亂川率敢死士擊之陷陣歿時稱烈士焉

劉玉鑾四川忠州吏目萬厯二十八年播州楊應龍率數萬人五道並出攻龍泉司玉鑾率家奴吏役挺身拒敵死之游之雲字飛卿以恩貢任德州判崇禎時遷陝西苑馬監正流寇圍城雲登陴拒守不食七日城陷死之乾隆四十一年

予祀忠義祠

胡士定字振常應中子少從瞿九思遊博記多通由選貢授潁州衛經歷署潁州事值獻賊肆掠士定集民兵城守每出戰殺賊賊憤甚圍攻益力城潰賊執士定挾之降士定大罵不絕聲賊抽刀連斫中其腦及肢體撲牆下賊謂已死捨去家人俱沒於賊賸老蒼頭從積屍中尋掖灌以湯藥得甦事聞朝廷旌其忠節擢知潁州以創甚給假歸里築吼江樓杜門

著述以終乾隆四十一年

子祀忠義祠子玉成諸生流寇掠鄉村被執不屈罵賊死

案通志以士定罵賊死入忠義傳王志據金德嘉胡經歷傳改入文苑縣志據胡氏家傳移入忠烈茲仍從通志

吳國璋號隱華萬曆時任神機營中軍兄亮嗣遷兵科遂告歸崇禎時歲荒出所藏穀數千石減價平糶活人甚眾後避賊觀音岩被執罵賊死時有胡之罷立砦羊頭岔亦以砦破死孫光宸諸生流寇盤踞其鄉執宸爲鄉導宸計免鄉人於難給之曰某地有金帛可掠也導賊出境及至毫無蓋藏賊怒殺宸鄉人德之葬而祠焉

舒益生字民裕其志孫幼尚奇節流寇至黃梅益生率死士四

人偵於石隴賊驚疑未卽至乃疾馳歸呼邑人遠避賊至居民數萬以預避得不死獻賊遣人持衣帛召益生手刃召者遯山谷閒乏食採野蔬自給凡三閱月後以高隱卒祀鄉賢子逢吉峻吉遂吉俱有學行詳文苑

梁重其諸生崇禎時與弟之遴集眾保大符山砦十五年獻賊自黃梅猝至一時十餘砦俱降大符獨守殺賊目百餘人賊怒力攻破之重其被支解眾俱屠

張楚勳字撫謙事父孝崇禎十六年與妻吳氏及三幼子俱被賊繫罵不絕口賊怒殺之屍骸悉遭燬滅先是長子開熙字功人諸生素以忠孝自勵遭流賊亂罵賊不屈觸石死至是闔門皆殉惟次子簡熙得脫開熙乾隆四十一年

黃州府志 卷之二十二
子祀忠義祠

張旦熙字象明崇禎時率鄉人堅壁守大佛山獻賊攻破之旦熙被執不屈全家殉焉時有方大美諸生獻賊招之不屈死張光環字君璉年十六補諸生明季流寇肆虐光環年八十餘率眾保集四望山賊莫敢近一日賊故引眾去砦中咸喜欲歸視其家光環曰此給我也皆不聽環亦不能獨留徐行至深溪邊賊數十騎忽擁至縛環招降環厲聲曰吾肯爲鼠輩辱乎遂赴水死三日顏色如生

陸嗣先字孟思天才豪邁喜爲詩劉養微極賞之又與吳亮嗣爲文字交獻賊破黃梅胡篤生主燕子砦嗣先主萬安砦約誓甚嚴賊至環攻其砦破之執嗣先授以僞官不屈墜馬死

子廷文亦被殺饒嘉軌編次其詩

吳敏師字恂可亮嗣子由恩貢任確山知縣解組歸時邑治經獻賊焚燬令移治中洲胥役結黨殺掠敏師以計定其亂遂聯絡蕪黃四十八砦與方國安諸軍攻獻賊於金沙洲奪舟百餘進攻武昌復其城事聞行取太僕寺正卿尋以追賊卒於湘中子兆崙諸生思父憂鬱卒

夏文緒字爾開負膽略崇禎時以軍功任四川總部獻賊入蜀文緒陣歿僕隸死散略盡妻董氏夜行晝伏子身歸

黃梅縣

張訓洪武歲貢生官鴻臚寺序班告養歸聞建文遇難拜辭其父士英曰忠孝難兩全矣乃正衣冠北面拜投井死子孫環

井而居至今稱忠井云一統志

沙瑞字鳳翔成化歲貢生事親孝任甯府紀善宸濠反覬瑞從
事瑞泣曰大王謀卽倖成千秋後且稱叛逆矧事未可知何
必首亂以憂太后乎宸濠恚曰若不從且死瑞頓首流血曰
甯死耳豈可失臣節囚之瑞痛哭自經死祀鄉賢參通志

周乃武初為諸生試棘圍不利遂赴武科聯捷進士授甯波遊
擊禦倭屢立戰功後為倭襲勒降不屈罵賊死

石有恆字伯常崑玉子性高潔以文章名萬曆己未進士初授
遂安知縣下車時以避勞邀利畏禍三事自誓以程朱正學
課士訓民輸運不任里甲有羨緡公儲之充運費督僮僕種
園蔬不用民一物士紳餽遺辭不受歲災親履荒瘠地問民

疾苦監司檄郡縣遏糴抗議力爭出帑金市粟民賴以濟調
長興縣再調常熟長興民籲請得留時巨豪葉朗山吳野樵
等結島寇為亂剽掠無虛日撫按檄有恆討之有恆設方略
擒其魁賊稍戢而餘眾散處湖蕩伺閒為出入有恆請馳檄
各屬分兵搜捕未果行天啓三年正月朔城門夜啓賊突入
有恆方正衣冠待漏聞變出立廳事賊露刃脅之不為動且
叱曰草賊敢叛天子殺王臣耶索印不可強之行不可以刃
傷其長子確亦不顧賊擁之出儀門有恆曰頭可斷此限不
可踰也遂被害血上噴移時不仆主簿徐可行奔赴亦死之
賊入署搜其篋粗葛二端俸金二兩而已賊亦相顧驚歎事
聞贈太僕寺少卿諡忠烈祀鄉賢有恆嘗與鄒元標講學東

林元標推服之子確詳宦蹟

參東林列傳

陳瑜字藍生天啓辛酉舉人性篤孝父歿刻像以祀由閩中教諭累遷至四川分守道寇犯蜀閱八月外援不至北面稽首曰臣力竭矣遂殉難蜀人立祠祀之

石礪字用之有信子廩生少負奇姿有勇略崇禎八年賊入黃州梅城岌岌礪破家貲倡守禦計奉祖崑玉書乞師江西開府得標卒三百人兼程抵邑甫入城賊騎突至礪率眾登陴堅守賊負版排列進攻發火毬焚其版明日賊駕雲梯逼城礪率士卒發礮石弩箭用巨鉤曳其梯斃賊無算賊積尸焚城下穢烟四塞礪令守者各含醋得不亂相持旬日礪晝夜巡城給錢米相勞苦婦高氏具橐餽餉眾眾益奮賊遁城獲

全十年冬賊驟至奪城門礪急令鎔鐵汁沃之賊死門爲錮架巨礮貫入賊營炙熱灰和糞以罐擲之賊稍卻明日賊隊忽繞而南大噪曰城破矣礪曰此其意不在南急趨視西北則果架長梯攀城上礪令擲飛槍舉前撓鉤法破之賊回營盛張宴樂礪亦椎牛饗士乘閒發礮殪其魁賊更爲戰樓瞰城中礪令截竹爲梨花繫長竿刺樓中縱火焚其樓賊遂遁去城復全未幾以瘵卒年四十有四邑人私諡曰端毅著有怡雲閣集夢餘隨筆等書子喬年詳儒林參通志

洪光裕字惟顯諸生同石礪捍城屢著勞績礪死力不支城陷被執罵賊不屈與子圖同死宗人世振年十三爲諸生督學董其昌甚愛其才城陷亦不屈死

黃州府志 卷之二十一
余鈞字有甯廩生任荆府鳴贊流賊陷蘄州奇其貌欲降之鈞
大罵賊怒殺之闔門皆被害同時諸生洪宇璇亦以罵賊被
賊剖心死

陳欽命字祇若萬曆戊午舉人初授直隸玉日教諭明季多難
莊烈帝詔天下以勤王備兵策欽命對稱旨擢兵馬司副指
揮闖賊陷京城死之

國朝

黃岡縣

汪基遠字星伯順治己丑進士授東鄉知縣黜姦貪撫良善清
田糧嚴保甲修城興學次第舉行有賊掠殺一家數人掩捕
得守巢窟者寘諸獄賊率黨來劫遠與弟基遂急乘陴禦之

漏下四鼓城不守乃北面再拜曰臣力竭矣遂遇害事

聞贈按察司僉事祭葬如例廕子惟錡官沁水知縣霸州知州嘉慶

六年補 給恩騎尉世職六世孫封渭承襲詳宦蹟江西名宦志

此傳本王志案縣志云時金聲桓叛後所在嘯聚土寇吳
君寵攻東鄉基遠督兵出戰死之弟基遂諸生東鄉之役
獨力保全基遠家屬及維錡卒於官復爲經紀其家以義
稱

王象虞伉直有智略順治初土寇起東山府同知選爲四十八
砦練長象虞提義勇千餘所向克捷時有紙砦鐵人練長王
君之謠子友柏化龍俱諸生以學行稱

孫如芝字素公工古文詩詞順治辛卯舉人除筠連知縣城中

僅七十三戶如芝悉心招徠創禮殿建城垣逾年大治當事奇其才檄修蜀志論列皆出其手丁內艱歸次江安值吳逆反賊帥強以偽職拒不受自縊死乾隆六十年補 給恩騎尉世職

尉世職

鄆正暹父母病躬嘗藥澣垢後任奉天海城縣典史有金州豪

王守祿通舟船為姦府屬正暹擒治守祿密賂以千金卻不

受獄益急守祿遂陰賂塾師觴正暹而酖之府廉得狀捕守

祿等六人棄市 案王志入宦蹟今依通志移入

胡珠字山佃明季諸生尚節義以走馬試劍自喜父早卒事祖

來通以孝聞獻賊之亂珠獻策巡撫宋一鶴聽其言而不能

用楚竟以破左良玉鎮武昌聞其名辟之不就遂避居岳州

平江礮溪躬耕自給吳三桂反迫致之珠走避瀕死者數得

免亂平反其居屋已灰矣而故人所寄白金三千擲野塘中

尚在覓其人還之康熙二十三年聘修楚志後客死於岳

吳之蘭字國禮黃州協把總有材勇康熙十三年東山賊何士

榮亂之蘭從知府于成龍進討力戰死土人哀其忠立祠祀

之 見于清端公政書

張本恕字全淑鳳來子諸生初為但店練長平石人砦山賊有

功康熙十三年羅山賊周鐵爪潛入麻城東山聚眾謀逆邑

有何士榮自長沙歸以吳三桂偽劄煽眾附之知府于成龍

率師使恕督所練勇防禦恕因陳山中形勢請益兵二百防

守黃土嶺及戰周鐵爪何士榮皆就擒賊平將上其功謝病

不起成龍爲表其門見于清端公政書

張尙聖字文先康熙壬子武舉有材勇十三年何士榮之亂尙聖受知府于成龍令率鄉兵四百人先駐黃岡廟賊眾突出戰於黃土垌尙聖冒矢石爭先與官軍合大敗之士榮挾矛走陷泥中就獲餘黨悉平後尙聖成武進士官守備同時著績者有貢生龔相且生員吳之鄒曹洪仁官純恭靖天德程鎮邦諸人見于清端公政書

胡來寅字協恭善屬文有勇力康熙時東山賊劫邨落寅出穀五百石爲糧率勇捍禦尋被執不屈夜乘間遁路遇官軍身先引導遂搗賊巢知府于成龍酬以金帛不受

陶之駿廣東茂名縣丞康熙十九年祖賊猖獗之駿領兵追剿至蕉林會武弁逃去之駿毅然直前歿於賊議卹廕一子思哲入監乾隆六十年追給恩騎尉世職

陶應鑿客西蜀嘉慶二年白巾賊倡亂鑿練勇禦之屢挫賊鋒賊畏其能聚眾數倍夜突至倉卒開勢莫能支遂遇害蜀人憐之葬於雲陽保祖山入祀昭忠祠見夔州府志雲陽縣志

鄒元熊有勇力善騎射由行伍拔補道士汛營經制外委巡緝江面晝夜不懈盜賊斂迹嘉慶元年調征襄鄖教匪屢著戰功五年七月大兵擊匪於鄖屬花果園元熊當先陷陣歿於軍給雲騎尉世職

萬鼎恩字芾棠承宗子官常德府經歷歷署州縣有政聲道光二十九年署新甯知縣縣自雷再浩煽亂民多不靖十月十

四日逆賊李沅發聲言入城劫獄邑紳擁鼎恩走鼎恩絕裾曰死耳城一步不可出賊至怒罵不屈遂遇害事

聞贈四品銜

給雲騎尉世職

賞祭葬銀祀昭忠祠子裕璋襲職

旋從大軍禦賊廣濟彭家村兵潰戰死復給雲騎尉世職

劉遐亮字執菴嘉慶戊辰舉人官漢州知州因病假歸寓居省

垣咸豐二年十二月四日粵逆陷城亮顧其妻曾氏曰吾與

若受

朝廷爵命義不辱於賊雖在籍與死官等耳起結縲於梁左右各

一夫婦朝服自經死先是城將陷亮呼妾陳及二女前各與

匹綾促之縊二女死陳氏氣不絕淚涔涔下遐亮肅衣冠拜

之目乃瞑徐遣奴僕輩持餘財散去有不忍去者數人後並

死於賊事

聞贈運同銜

給雲騎尉世職並

旌其妻

丁璜號礪溪道光辛丑進士歷左雲萬泉知縣皆有治績咸豐

三年粵匪北竄璜時任曲沃親率兵勇登陴固守晝夜不懈

賊虜至穴地轟擊城陷璜返署朝服坐堂皇賊至呼曰汝不

畏死耶璜罵曰生不能殺汝死當爲厲鬼滅賊遂死之前一

日璜題詩自誓曰偶傳烽火卽糾紛取義成仁夙所聞地下

若逢恭世子應憐伯氏早圖君事

聞贈知府銜

給雲騎尉世職

江可超咸豐四年粵賊踞黃徵鄉民納貢超謂其姪履和曰時

危見節義豈可俯首乞憐於賊乎乃捐貲募勇數千拒賊三

黃州府志

卷之二十二

忠義上

三十四

黃州府志 卷之二十一 忠義上
三十五
月二十四日與賊戰於宋家塢勇潰超與履和同日被殺廬舍亦焚履和職員蒙 給雲騎尉世職

邱文號斐臣道光癸卯舉人選江夏教諭未赴任咸豐五年隨知縣翁汝瀛督勇至漢口勦賊正月初十日陣亡 給雲騎尉世職入祀忠義祠文死後其父從九品振聲復督鄉團同治三年六月賊至被執脅降不屈斷其右肱以死

贈鹽運司知事銜復 給雲騎尉世職

羅文彪號春圃諸生性剛直督辦鄉團咸豐五年正月初十日隨知縣翁汝瀛勦賊漢口在後湖陣亡子樹梅潛入賊境負屍旋里面如生同里監生林志依馮光瀛沈飛鵬沈洪鈞俱於是日戰沒武生徐飛鵬最稱驍勇是日率勇至武當口遇

伏起飛鵬衝突往來連斃數賊因馬傷力盡死後文彪志依

均 給雲騎尉世職沈飛鵬洪鈞同入祀忠義祠

郭錦祺從九品咸豐四年傾家貲首倡團練禦賊於郭在岡程家山石頭觜等處斃賊無算五月初十日隨知縣翁汝瀛勦賊江漢至沙口陣亡

贈鹽運司知事銜 給雲騎尉世職

黃作霖字壽民負才未遇以吟詠自娛粵寇之難霖爲六堡練長誓死滅賊咸豐五年十月知縣葛致遠禦賊失利霖率勇往援至丁家壩賊麇至霖知不免以馬授故人子馳去力戰死之賊退殮其屍令旗猶未去手時隨霖掌金鼓者曰黃紹福殉焉邑士錢莆田爲詩哭之士大夫屬和者眾

梅兆棠字衢達諸生性剛毅初爲團練長有禦賊功已而賊麇集約數萬眾知不敵咸避去棠憤然曰大丈夫死耳何避爲賊及門棠罵曰反賊敢入我室賊扶之罵益厲仲孫垂綬被執不屈賊並殺之棠繼妻周孫婦邵均以罵賊被殺棠蒙

給雲騎尉世職

許堂昭諸生篤學尙氣節咸豐六年粵賊竄黃脅昭至上巴河誘之降昭罵不絕口賊以兩刃夾其頸罵如故巴河人知昭者環跪賊前求釋昭曰吾自分死耳汝曹奚爲叱之起賊知其終不可屈殺之

易正詵咸豐四年在籍辦團練七年從大軍解固始城圍尋帶楚勇克復天長縣積功至守備兼理營務同治元年禦賊於

上海縣浦東力戰陣亡 給雲騎尉世職

汪春溥字璧餘浙江昌化知縣咸豐十年粵匪竄昌化昌化無城春溥練勇八千守縣之十二都相持五閱月賊敗走盡復縣境十一年因公進省城陷春溥投望仙橋河死事

聞賜卹加知府銜廕一子入監

胡霖澍號石渠美彥子道光甲辰進士歷婺川貴定義興知縣署遵義府事咸豐五年丁父憂時獬苗蠢動黔撫奏請奪情留署固辭不可乃墨經從戎練勇保衛境賴以安同治元年三月二十三日苗匪圍城糧絕城陷霖澍督勇巷戰力盡死之妻蕭氏子超倫弟霖灝弟婦汪氏姪全倫姪女一及僕婢等皆殉事

聞贈太僕寺卿 給世職入祀昭忠祠事蹟宣付史館

洪恩潤號朗泉州同加五品銜性剛直同治三年五月捻逆竄境潤議率鄉勇堵禦先奉母移避團風鎮行至淋山河賊驟至使僕奉母先行自留餌賊賊酋令負槍潤罵曰狗賊我方欲殺爾爲爾役耶賊怒斷其脰而死議卹

贈知州銜 給雲騎尉世職

陶宜橋字步臯性豪邁初倡辦團練總督楊需保授六品銜同治三年五月粵逆竄上伍鄉橋督勇八百餘堵禦十七日賊大至勇士余保元力戰死眾驚潰挾橋走橋泣曰吾母尙在牀褥吾何忍棄之徑歸家賊適至搜得團練戳記怒曰吾仇也舉火焚其屋橋以身衛母鬚眉俱焦賊拘至門外罵不絕

聲賊剖其腹而死母卒被焚橋妻劉氏媳節婦謝氏同被害婢菊香亦焚死賊退其友邵樂裕爲殮葬焉

宋昞字亮臣治咸孫諸生性聰穎博聞強識自經史諸子外天文地輿算法兵術靡不精曉下至蟲魚草木諸細碎書日識數千言歷久不遺一字生平嚴毅孤峭以忠義爲質同治三年五月粵匪犯黃昞激勵團勇力戰不勝罵賊死

贈鹽運司知事銜 給雲騎尉世職

汪兆文偉軀幹膂力絕人應郡縣募討賊所向披靡從大軍征江南數有功累保江蘇補用參將同治四年假歸捻逆適至兆文督鄉勇戰於鵝公頸不勝死之從死者數百人 給騎都尉世職

萬成鸞字鳴岡博通經義尤邃於史漢同治四年捻逆盤踞漢黃閒道員梁作楫徧招策士鸞與焉與賊戰於武湖敗績賊擄鸞至黃陂姚家田勸之降不屈遇害賊退鸞戚陂邑孝廉方正周玉書歸其屍面如生

蕪水縣

官撫渙字萃之應震子順治初由監生任會稽知縣時郡守持法太峻渙請少需之弗聽民乃揭竿殺郡守及鄰邑官不忍及渙抗節不屈遂遇害事

聞贈按察司僉事

賜祭葬錄其子純心

賜名存均入監讀書嘉慶六年補

給恩騎尉世襲罔替

參通志

高有功幼爲賊所掠及長遂籍山東以材能授守備康熙十八年署廣東虎門協右營都司駐潭州號令嚴肅征剿海寇血戰死事

聞贈廕

賜祭葬子二僑寓肇慶

郭沛霖號雨三用賓弟道光丙申進士改庶吉士授編修大考升贊善咸豐初以道員留南河補用署兩淮鹽運使旋攝淮揚道粵逆犯揚州沛霖飛稟乞援辭稍釐激與大帥齟齬被劾落職九年隨巡撫翁同書軍於定遠賊至沛霖登陴固守踰十餘日援絕城陷遂遇害孤子階求遺骸不得收遺衣冠殮之事

聞奉

旨復原官照道員例議卹 給雲騎尉世職祀昭忠祠並祀江蘇名

宦祠

義僕附

涂采林余鳳祺僕同治三年賊至林負主人子逃子被殺林亦
被創或勸速遁林曰主人以子託我死而棄之何面目見主
人乃負屍閒道歸卒遇賊被殺

麻城縣

項煊諸生少任俠尚義咸豐初粵匪竄楚煊倡起鄉團屢著戰
績累保訓導加五品銜從官軍至沔陽里仁口禦賊力竭陣
亡 給雲騎尉世職

朱濟南王世友俱監生沈登瀛儒士咸豐三年督勇隨知縣韓

寶昌破賊復縣城後禦賊於龍困橋全師盡沒三人從寶昌

殉焉皆 給卹如例

李忠典咸豐四年二月在石陂區練勇以衛鄉間先後殺賊無

算七月初六日賊至忠典奮力衝鋒復大敗之遂會官軍復

縣城九月隨知縣賀棨赴蘄水助勦力竭陣亡 給卹如例

夏煥諸生老成練達鄉望素孚咸豐四年粵匪駐麻城煥同詹

兆朱胡鼎三童先桃等倡義起團殺賊復率各鄉練勇從官

軍規復縣城後隨知府許賡藻出境追勦在廣濟縣陣亡

汪名儒一名金品恂謹敦厚少從學於同里詹兆朱與胡鼎三

童先桃相友善咸豐四年隨同倡團殺賊旋從總督楊需勦

賊至廣濟陣亡 給卹如例

黃光煊候選布政司理問咸豐四年隨父品隆督勇保障地方與賊戰輒勝旋以帶勇出境勦賊在廣濟車河鋪陣亡 給

雲騎尉世職

陳際清任江蘇吳江縣主簿候補知縣咸豐四年粵賊踞金陵

吳江失守際清在任所殉難後 給卹廕如例

程輔弼武生保舉千總加五品銜咸豐四年辦理團防充練首

從知府許廣藻勦賊蕪水蘄州等處所向有功五年二月帶

勇至岡邑淋山河追賊沒於陣 給卹如例

謝道坦諸生品學純粹咸豐八年三月粵賊陳玉成由松子關

竄麻道坦率鄉兵百餘人當其鋒戰敗被執不屈死其長子

長達孫紹德俱力戰陣亡妻熊氏罵賊死媳熊氏投崖死一

門義烈人咸惜之後 給卹廕如例

夏文高節義錄監生成豐八年粵賊竄麻城文高督數區鄉兵

於閩家河邀擊眾寡不敵遂敗且死 給雲騎尉世職監生

彭守楷亦同日陣亡

陳懋增生性誠樸有學行咸豐八年為賊擄入邑城屢欲屈之

懋謾罵不已遂不食數日死同難有見其事者始為人言之

後 給雲騎尉世職

饒立誠諸生成豐八年粵匪陷麻城立誠為所執欲屈之誠大

罵遽奪其械反傷賊俄眾賊至遂被害 給雲騎尉世職

劉懷政監生成豐十一年三月賊至懷政諭以大義賊截其耳

復抗聲罵賊賊怒以槍斃之

田立榮武生咸豐十一年賊由蘄水北竄榮居二里河夜中聞警卽赴鄉局舉號督勇突與賊前鋒遇徒手搏戰暗中奪得賊槍殺數人力竭死隨丁劉六同殉榮妹亦於是日罵賊赴水死

曹之瑚諸生性素迂樸同治二年賊至獲瑚瑚爲陳說利害諭以大義復謾罵不絕聲賊怒殺之

胡朝曙諸生孝友方正里黨素稱同治二年督勇禦賊兵潰被執不屈死

朱世昌武生同治三年賊至率鄉人守人和堡賊攻之不克乃以長圍困之絕其汲道眾潰而堡破世昌死之

丁錫宇廩生品行端正同治六年二月自黃州送考歸至邑南陶家砦遇賊被執錫宇大罵賊脅以刃不屈死 給雲騎尉

世職

黃安縣

張百程字日闢鵬翔子諸生篤學兼精騎射崇禎時流賊竄境結堡保聚鄉里九年應試郢中寇逼城射殺緋衣白馬賊時婦女數百幾不免百程持滿捍禦悉賴以全十六年土寇起帥堡眾討平之百程節義文章爲士大夫引重爭相延聘所贈遺悉以購書著有樸園文集卒祀鄉賢子希良詳文苑希聖詳儒林

吳載瑜字石攻諸生明末流賊猖獗瑜建砦磨盤嚴守禦勦除

黃州府志卷之二十二
賊首及其黨數百人里中以安順治時土氛復熾邑令任諭
爲團長仍守磨盤以扼要害羣逆不敢窺伺賊平上其功提
督松將奏請官之以老辭

周文衡字旦生諸生順治三年六月流寇猖獗眾推衡爲練首
峙糧於峯山砦畢力捍禦賊久不退衡命弟文健夜半潛出
請救於官兵已而救兵至亦敗圍久糧絕不能守衡率眾突
圍血戰死

江中清字公砥諸生明末賊氛起歲且洊饑羣推清爲大峯山
四十七砦長事無鉅細咸取決焉順治初土寇肆擾清據守
大峯堡極力防禦凡八閱月賊不敢犯境事平邑令上其功
將官之固辭不出

孟存誠字明善諸生順治六年土賊王晉功等結黨十餘萬爲
亂誠與族振凡戚江底聚勇於岱峯山砦悉力堵禦賊晝夜
環攻誠隨機應變相持六閱月賊多死傷適巡撫遲提督柯
率大兵至圍始解弟存謨以孝稱

李之璉字蜚聲年十五爲邑諸生先居省會獻賊陷城投江殉
難流三十餘里漁人救之復甦康熙十三年吳逆猖獗邑令
徐委辦團練境內以安復值河南賊譚以從作亂將及縣境
守令檄璉往撫乃入賊營指陳利害反覆勸諭賊竟降事平
以功當賞力辭不受

熊之貞監生嘉慶二年春教匪由羅山仙花鎮入犯之貞與從
兄文炳招聚丁壯數千於東西二土脊嶺堵禦賊不能進越

四日天大雷雨東嶺兵潰之吳罵賊死之文炳復收餘燼連獲二賊賊始遁去之吳 給卹如例

彭宗達號信甫國欖孫咸豐壬子進士授戶部主事尋假歸四年粵匪竄縣境倡捐募勇禦之四月十九日督隊搗賊巢甫合圍賊遁去七月侍郎曾國藩攻克省垣以手書期會水陸並進宗達率勇追剿獎賊多名九月十五日大戰於蘄水南關外雲路口自辰至未力竭遇害時年三十有九奉

旨照知府陣亡例議卹 給雲騎尉世職入祀昭忠祠

姚熙士李中瑜涂正山金鳴謙咸豐四年粵賊踞縣城沿鄉剽掠熙士等團勇剿捕獎賊多名二月賊至河口熙士督戰於北岡失利被執不屈死四月十七日中瑜在李態灣督戰陣

亡十八日正山率勇攻城中礮死鳴謙拔戟先登與賊巷戰被戕旋團勇齊集攻退城賊熙士等以倡首遇難人咸惜之高桂芳咸豐四年督家丁與吳承周剿賊至城北河岸持挺連斃數賊復前追遇伏死知縣許賡藻嘉其忠義厚賻之夏鎮東字景陽生平篤嗜詩書咸豐四年六月禦賊被執脅令造烟民冊鎮東不從被賊拷掠死

秦楚材諸生咸豐四年六月率眾禦賊因大雨勇潰被執不屈死

郭清棟監生膽略過人咸豐時粵逆犯境捐貲團練隨知縣許賡藻收復縣城所向輒先入時稱頭隊軍以功保五品銜旋因受重傷病卒同時諸生李振春督勇屢獲勝仗後戰沒於

陣

趙錫齡字與三成豐八年四月賊犯境捐貲募勇堵禦身親七戰手刃數賊陷人陣與勇丁姚玉山同遇害邑令林爲文以弔之

宋步雲字海樓廩生善屬文尤精岐黃術咸豐閒率生徒赴郡試遇賊被脅至隨州終不屈遂遇害隨人憐而葬之其弟某尋至啓棺視之面如生

陳世慧號敏亭監生少孤事母孝讀書識大體同治元年督勇禦賊殉難學師柯茂枝作詩輓之同時儒士吳秉鉞亦以督勇勦賊死

陳兆奎監生少讀書明大義同治元年九月糾勇禦賊眾潰被

執賊欲授以僞職不屈死

程式玉監生同治二年賊入境式玉被擄逼降不屈賊怒因焚死

鄒恆朗號心齋監生隨官軍營辦文案因克復金陵保授盱眙巡檢同治二年赴任遇苗逆被執大罵不屈死其妻弟諸生王殿賓殉焉

王文光年八十二同治三年五月賊由河口東竄文光督勇未齊賊突至被執大罵不屈賊支解之越日其姪諸生棟殮其屍怒容猶未釋邑人袁惟毅作壯氣歌輓之

阮太崇守紅幹山砦同治三年五月賊圍攻砦北門甚急崇率勇出砦擊之礮傷賊首數名賊卻旋以後援不繼力戰死

程茂學倡首督團前知縣許賡藻獎以職銜不受同治三年八月賊益集長塔茂學率勇堵禦眾潰被執勺飲不入口越六日死諸生吳鴻賓亦同時督勇陣亡

秦再瀛諸生性剛直博覽羣書同治三年捻逆竄城北被執不屈大罵死之

王兆渙諸生膂力過人同治四年十二月偕宗族男婦百餘人避賊水口寺賊圍寺門渙發礮斃二賊賊索渙急渙曰予不出無以救眾人從屋上大呼躍下且鬪且走賊追及之縛而沈於水眾獲脫

阮藍瑛諸生倡修上竿山砦保障一方同治四年十二月賊入境瑛率眾堵禦屢挫賊鋒五年正月二十四日下山追勦力

戰受傷回砦嘔血死

羅田縣

熊五緯字臥雲道光丙午舉人咸豐四年三月粵匪陷羅五緯捐五百金倡督鄉團同知縣彭仲芳殲賊於石柱山七月遂復羅城時蕪水陷賊前令劉縻新令際亨同來請兵五緯慨然直前至蔡家河遇賊猝敗之追至蕪水城三戰皆捷賊憤甚八月二十一日賊合死黨三萬餘蠡擁至廬戰久團兵稍卻五緯揮戈入陣左右衝突身被數創死明年大吏奏其事奉

旨賞世襲雲騎尉附祀武昌昭忠祠五緯負匡時大略而忠義憤激之氣每寓於詩著有仰止書屋集

節縣藝文志本傳

張立志膽略過人每戰以雙刀陷陣賊憚之咸豐四年八月從熊五緯援蘄水破賊於土門中礮陣亡

楊力虎監生倜儻有大志咸豐四年賊竄羅田知縣彭仲芳退保多雲鎮力虎偕聞其政招募丁壯倡起鄉團屢獲勝仗既而攻克英山蘄水等縣大小十餘戰皆身先士卒所向有功保用州同旋因積勞成疾卒

張賢林諸生有膽略咸豐四年十一月督勇攻賊於英山城被執林罵不絕口賊剗其腹裂其尸倍極慘毒

王炳榮字華舫諸生保舉教諭加六品頂戴咸豐八年二月二十二日督勇勦賊於英山陣亡 給雲騎尉世職

郭映暄武生五品銜咸豐五年八月同子陽和壻李時蔭督勇

攻賊於蘄水陣亡附祀武昌縣昭忠祠武生屈飛鵬亦同日陣亡

王培榮咸豐時以縣丞署宿松知縣賊屢犯境培榮團勇防堵閒出奇計破之九年隨官軍駐定遠賊環攻城陷遇害 給

雲騎尉世職

周士濂江蘇候補知府奉巡撫薛煥檄帶勇進攻太倉州同治元年四月十九日與賊接仗力竭陣亡 給雲騎尉世職

潘鼎梅字燮卿諸生候選訓導好學能文慷慨有大志同治三年賊犯羅田督勇迎戰遇害

贈國子監學錄 給雲騎尉世職

熊五修字禮臣監生豪爽有才辦理團防屢立戰功歷保府經

歷同治三年五月禦賊於官亭山兵敗死之

贈知州銜 給雲騎尉世職

葉為璜字渭溪咸豐戊午舉人同治三年六月督勇禦賊臨陣被執大罵不屈死之

贈都察院經歷廕一子入監

何敬之儒士同治三年六月率勇禦賊於花銀巖力竭被執不屈死之越數日殮其屍見襟上有詩云縱非罵賊死卻勝從賊生生難破賊膽死定追賊魂

蕪州

韓宗愈字又昌其先陝西人以父友 恩廕官陽朔知縣性剛直不屑夤緣當事會吳逆兵起愈抗節不屈以死妻李氏扶

櫬歸葬

吳尙賢號立齋乾隆癸卯武舉任襄陽水師營千總署都司嘉慶元年正月隨總兵曾攀龍於宜昌府鳳凰山攻剿教匪攀龍陣歿尙賢奮力死戰亦遇害事

聞給雲騎尉世職入祀昭忠祠

孟春旭號九齋監生精岐黃術活人最多咸豐三年十月賊至被執不屈鞭撻數百仍罵不絕口越一日死

宋南英貢生直隸州同銜督勇剿賊咸豐七年在蔡家村陣亡

贈知州銜 給雲騎尉世職

陳杏林號春農漢中府經歷保舉知縣同治二年賊至守城力竭遇害二子亦同殉焉 給雲騎尉世職

方樸初字素吾郡廩生以軍功保舉知縣加五品銜光緒元年
隨都統多隆阿營與賊戰於陝西三橋地方力竭死之

廣濟縣

胡楮思字其讓廩生以父一壩廩康熙十九年授鎮安府通判
值雲南土富州州判沈文崇子紹基作亂踞府城楮思抵蓮
花嶺賊拒不得入乃招集鄉民並調田州諸土司兵議剿賊
遽棄城走踞上甲馬隘楮思既入城官軍猶未集土兵赴調
者無幾九月初一日賊乘夜攻陷之楮思厲聲罵賊遂遇害
乾隆二十九年入祀昭忠祠鎮安府志
參通志

劉洪度字若干生有異稟由監生任岑溪知縣邑雜猺獞時出
剽掠洪度團練鄉勇擒其渠魁諭以義而遣之遂感激向化

擢石屏州知州以進藏功晉威遠同知適猺黑焚慢哈地方
洪度率眾捕之又奉檄密拏土官刁瀚通志作
刁瀚除其害因署
鎮沅府事兼攝恩樂縣值改土歸流一切草創稽戶口清田
賦悉心安輯奔馳不暇歲暮至鎮沅雍正五年正月猺黑驟
圍城正部署閒而武弁先遁城遂陷洪度手刃數賊力戰死
事

聞贈鎮沅知府

諭祭廕子恩謨入監並

誥封其父自理中憲大夫參通
志

周錫捷字報功監生身軀俊偉善拳棒咸豐二年冬粵賊踞武
昌武黃同知施鏜諭起團練於武穴各隘口設八棚棚設更

夫二十名命捷督之以監生張希魯文童劉宗岱周炳義捷弟錫鑾爲之佐捷每曉更夫以大義人皆知憤三年正月賊下竄捷與希魯等議集更夫禦之議未就而賊至捷見事急手持雙刀立刃二賊賊環刺之洞胸死希魯宗岱炳義錫鑾同殉焉

以下本廣濟

卽義紀略

胡春柏縣書吏咸豐四年其弟春栗奉縣諭辦團柏襄其事十月十五日賊至搜柏身得勇冊執冊使指引將盡屠之柏不可拷掠無完膚終不言賊怒焚其廬拽至城東五里坡支解之

夏壽朋咸豐四年冬充勇目其叔廩生黻墀爲團首十二月二十七日賊竄至龍坪掠其家見旗幟縛壽朋強詰以團練姓

名先淋沸水繼加炮烙壽朋絕不言賊怒剖其心肝死

胡文雅字則端監生咸豐四年除日總督楊需所部兵潰賊入北鄉新耳砦逼其鄰婦將亂之文雅大罵往劫賊婦逸去賊怒斫其首罵猶不止疊被槍矛死賊退家人殮其尸鄰婦具哀經若喪父母焉

張鵠字瑞園道光己酉武舉咸豐七年夏佐知縣李遇泰督團練以偏師禦賊於打杵口陣未成賊麇至鵠力戰不敵遂遇害初縣境戒嚴遇泰將請兵於都統多隆阿而難其人鵠以單騎往旣得請且奪賊驢馬數匹而還至是卒 給雲騎尉世職

徐名聯儒士咸豐七年五月十三日被賊某擄去逼指巨室之

有窖金者名聯弗應賊怒斷其一指再四問終不言以次削其十指備極慘酷而死明年夏聯子正玉擒某賊於途獻於官磔之時論稱快

張家學儒士咸豐七年五月賊踞錢家塆擄家學誘使爲書手家學憤罵曰吾輩讀書人豈爲賊曹弄筆墨耶強之不從賊怒斫之中七傷死

陳懋業字四悅性剛直族事咸取決焉咸豐七年夏率族眾擊賊殺三人餘逸去次日賊以千人至懋業知不敵悉遣其眾遂被執賊剖其心肝決首而去

呂純詩居鄉爲童子師咸豐七年六月初十日路遇賊脅至黃梅大河鋪拘數日屢加以黃巾赭衣純詩卒不屈賊怒縛其

手連斫之死賊退家人覓其屍猶以故衣得識焉

伍文彬字金周諸生同治六年二月遇賊被執脅之跪文彬大罵曰我秀才豈爲賊屈耶賊怒以洋銃擊斃同時諸生郭石渠國子監典簿張鍾冕監生岳兆祥以不屈死均 給世職

黃梅縣

黃景恆胡君孚吳之棟俱諸生崇禎開寇擾蘄黃三人奉上憲檄聚眾防禦於邑西之舒城山其山三面臨水乃斷山北陸路引湖水環之壘土爲城城上設木柵置男婦其中賊初與石礪角旣偵知山有積粟撤兵來攻君孚急呼眾持魚叉殺賊兼放弓弩賊少卻至冬水枯築白湖橋口水驟漲漂賊壘賊死大半隨乘木簰來攻矢落如雨君孚招眾排舟載板束

草其上賊矢攢草上或射板片不得入人藏船中架百丈火發獎賊無算賊驚散三人均衣食息紛競別男女累眾至數萬皆有統紀時賊氛四起縣城鄉聚俱破壞而舒城山獨完順治二年總督佟以賢能薦赴部邑令張典趣就道景恆等俱辭不赴君孚子淑詳篤行

廖士貞號介石以九江衛籍中順治甲午江西鄉試康熙十九年除營山知縣甫而月滇孽譚宏裨將彭時亨叛被執至渠縣拘繫月餘誘以偽職貞大罵不屈北向再拜引頸就戮事聞贈四川按察司僉事祭葬如例祀四川名宦京師昭忠本邑忠義各祠廕子應拔入監後官汶川知縣詳宦蹟嘉慶六年補

給恩騎尉世職

參通志
四川志

朱宗廷咸豐四年春粵賊陷梅擄入城脅以刃不屈且罵賊奇其貌甘言誘之罵益厲擁至城西石梁上叱曰跪乃免宗廷曰頭可斷膝不可屈遂殺而投諸水仍植立水中不仆

董明壽咸豐四年冬提督塔齊布匹馬行江北覘形勢日薄暮賊掩至壽與里人張心純者潛護送至陸家背渡江賊覺之怒磔壽純赴水死

熊繡號青齋嘉慶甲子舉人性戇直聲如洪鐘咸豐初署通城教諭值粵逆陷城繡請兵克復卽攝邑篆五年團勇於本邑黃泥坳十月賊大隊忽至眾潰遇害

贈都察院經歷 給雲騎尉世職

帥遠燁字逸齋承瀛孫少磊落有大志道光丁酉拔貢生

恩賜舉人丁未成進士選庶吉士授編修咸豐初軍事日棘屢上疏
言事六年援例以道員候選謁侍郎曾國藩於江西慷慨談
時務國藩奇其才頃之國藩以親喪旋里遠燁蒿目時艱知
天下事非曾公莫辦親至其家勸之出山留連巾月始返江
西大吏旋奏留委用七年粵逆擾撫建官軍屢敗遠燁憤甚
募卒千人赴東鄉堵剿十月七日賊大至眾寡不敵營陷遠
燁手刃數賊力竭死兄子布理問疇廩生萬泰同遇害事

聞贈光祿寺卿諡文毅

賜祭葬 給騎都尉世職

敕東鄉及本籍建專祠疇

贈知州銜 給雲騎尉世職並萬泰均附祀

吳正諸生咸豐七年遇賊奪刀斃之他賊怒肆加殘毀正罵不

絕口死

程銑字鵬萬由監生授安徽池河巡檢粵匪東竄以守禦功陞
知縣咸豐九年攝來安篆十年四月賊渠龔某率眾萬餘陷
來安銑督勇巷戰力竭遇害子元勳殉焉

贈直隸州銜照知縣例議卹 給雲騎尉世職

鄧文鑑字達甫諸生練勇剿賊嘗擒賊目奪其矛並獲偽印救
出難民無數復捐貲倡修萬家堡同治三年秋賊至鑑督勇
禦之力竭陣亡受害甚慘

敕於本堡內立祠建坊 給雲騎尉世職

補遺

蕪水縣

夏繼青字湛若明季副貢生性剛直流賊躡楚傾貲結砦野鶴山賊至事急眾議欲降青獨持不可極力堵禦賊悉眾圍攻砦潰青衣冠危坐罵不絕口賊怒遂鬻割以死子諸生時敏枕遺骸痛哭賊憐其孝委之去青博學多能著有鶴山文集縣册

黃岡縣

飯桶佚姓名以力大善飯故名傭於宋埠有年咸豐四年賊至埠逼使降大罵不從賊鬻割之至死終罵不絕口麻城志

黃州府志卷之二十二上終

